



# BOSANSKOPETROVAČKI VJESNIK

## Mjesečnik Općine Bosanski Petrovac

Uređuje: Kabinet Općinskog načelnika, tel.: 037/883-570 i 037/883/571, fax: 037/881-012, e-mail: opcinabp@bih.net.ba

## Kod Kule u Bjelaju na jarbol postavljena zastava BiH



Zastava BiH kod Kule u Bjelaju

Kako je 7. marta 2007. godine Stari grad Bjelaj proglašen nacionalnim spomenikom, Vlada Federacije Bosne i Hercegovine bila je dužna osigurati sve pravne, naučne, tehničke, administrativne i finansijske mjere za zaštitu, restauraciju i prezentaciju nacionalnog spomenika. Međutim, već godinama se ništa nije učinilo po tom pitanju, pa ni postavljanje informacione table sa podacima o nacionalnom spomeniku.

Naša Opština je na inicijativu Alisa Talića, građanina BiH, koji se nedavno, putem elektronske pošte javio načelniku Zlatku Hujiću, početkom decembra kod Starog grada Bjelaj na jarbol postavila zastavu BiH.

### Navodi iz e-maila koji je upućen načelniku Hujiću:

„Najprije, kao građanin BiH želim Vam se zahvaliti na predivnom spomeniku koji ste posvetili četvorici Bosansko-petrovačkih velikana, odnosno Bosanskohercegovačkih velikana, i na taj način našu državu obogatili još jednim izuzetno lijepim i značajnim kulturnim spomenikom...dalje, zbog čega Vam se obraćam, jeste to što bih Vam želio predložiti da na tvrđavu Bjelaj kod Bosanskog Petrovca postavite veliki jarbol sa državnom zastavom BiH...“

Zastava je postavljena u blizini Kule, na mjesto gdje je vidljiva sa svih strana sa velike daljine. Na ovaj način, naša Opština je još jednom pokazala interesovanje i brigu za kulturno naslijeđe koje je čini bogatijom, prepoznatljivom i jedinstvenom.

### Da se prisjetimo historijskih činjenica...

Srednjovjekovni grad Bjelaj se nalazi na rubu Bjelajskog polja i moćno nadvisuje današnje selo Bjelaj. Bjelajska kula datira iz prve polovine 14. vijeka i danas je dosta dobro očuvana. Najstarijem jezgru grada pripada okrugla kula visoka 16 metara i gradsko dvorište nekada opasano snažnim bedemom. U gradu je bio dizdar (zapovjednik tvrđave) sa malom posadom sve do 1838. godine.

## ODRŽANA PRVA SJEDNICA OPŠTINSKOG VIJEĆA U NOVOM SAZIVU

Dana 15.12.2016. godine u Bosanskom Petrovcu održana je prva redovna sjednica Opštinskog vijeća u novom sazivu. Predloženi dnevni red sadržavao je osam tačaka.

Nakon otvaranja rasprave, sekretar Opštine je po ovlaštenju načelnika povukao četiri tačke dnevnog reda. Međutim, isti je dopunjen sa još tri tačke od strane predsjednika klubova SDA, SNSD i SP. Nekoliko vijećnika je u svojim diskusijama izrazilo svoje neslaganje

sa predloženim dnevnim redom, te kršenjem Poslovnika o radu.

Od šesnaest prisutnih vijećnika devet vijećnika je bilo za predloženi dnevni red, te je isti usvojen. Međutim, preostalih sedam vijećnika je nakon ovoga napustilo sjednicu OV. Odluke o formiranju komisija OV, izglasalo je preostalih devet vijećnika.

Izražavajući sumnju u pravnu valjanost i zakonsku osnovu tačaka dopune dnevnog reda, sekretar Opštine i sekretar

OV upozoravali su vijećnike da - po ko zna koji put krše Poslovnik o radu, kao i druge propise.

Naime, ni to nije bilo dovoljno, pa je devet vijećnika (većina) izglasala odluke koje nisu pravno valjane i zakonski osnovane.

Obzirom da donesene odluke nisu u duhu pozitivnih zakonskih propisa, načelnik Opštine će odmah pokrenuti preispitivanje istih, u skladu sa Zakonom.

I to se desilo:

# Općinsko vijeće nije usvojilo Odluku o privremenom finansiranju Općine Bosanski Petrovac

U srijedu, 27.12.2016. godine održana je I vanredna sjednica Općinskog vijeća Općine Bosanski Petrovac, s ciljem da se donesu finansijski akti koji su neophodni za funkcionisanje organa uprave. Naime, pred vijećnicima su se našle tri tačke dnevnog reda, predložene od strane Općinskog načelnika, i to: Nacrt budžeta za 2017. godinu, Nacrt odluke o izvršenju budžeta za 2017.godinu, kao i Prijedlog odluke o privremenom finansiranju Općine. Riječ je o tačkama koje po svojoj nadležnosti, predlaže i provodi Općinski načelnik.

Raspravljajući o prvoj i drugoj tački dnevnog reda, nacrtu bužeta za 2017. godinu i prijedlogu odluke o izvršavanju istog, predlagač je istaknuo da je nacrt bužeta bio spreman još u novembru mjesecu, ali je povučen sa dnevnog reda I redovne sjednice iz razloga što još uvijek nisu bila formirana radna tijela OV, konkretno Komisija za budžet, kojoj je, po statutu Općine, djelokrug rada davanje mišljenja na sve odluke koje su vezane za budžet i njegovo izvršavanje.

Nakon što su formirane sve komisije i ispoštovane sve formalno-pravne pretpostavke, Općinski načelnik je ponovo uputio nacrt budžeta za 2017.godine u proceduru, predlažući vijećnicima da se ispoštuje rok od 15 dana za provođenje javne rasprave, kako bi svi građani, pravna lica, institucije, udruženja, nevladine organizacije i drugi subjekti imali dovoljno vremena da izvrše uvid u najznačajniji finansijski akt svake općine.

Koalicija SDA-SNSD-DF-SP- SBB Fahrudin Radončić je insistirala da se budžet donese do kraja 2016.godine, na taj način, ne ostavljajući prostora za javnu raspravu na kojoj bi učestvovalo što više građana Općine. Imajući u vidu praznike koji dolaze, ostali vijećnici su primjedbovali da se budžet ne može donijeti za dva dana, te da o njemu moraju biti informisani svi građani. Uz negodovanje koalicije, nacrt bužeta i nacrt odluke o izvršavanju istog su usvojeni, a nadležna služba je zadužena da u skladu sa zakonom, zakaže i provede javnu raspravu.

Iako zakon nalaže da je u ovakvoj situaciji sasvim opravdano i neophodno da vijećnici po inerciji, budući da se sve tri odluke uzajamno prožimaju, usvoje i treću predloženu Odluku o privremenom finansiranju Općine do marta 2017.



1. vanredna sjednica Općinskog vijeća

godine, na opće iznenađenje, prilikom glasanja, vijećnici koalicije SDA-SNSD-DF-SP- SBB Fahrudin Radončić su ostali suzdržani, tako da predložena odluka nije dobila većinu.

Ovim činom, vijećnici koalicije su u potpunosti blokirali organ uprave, koji nastupanjem 2017.godine, ne smije izvršavati svoje obaveze, vršiti nikakva plaćanja, pa čak i ona koja se odnose na plaćanje komunalnih usluga (gradske rasvjete, čišćenje puteva) ili davanja za socijalne slučajeve, kao što su pomoć potrebitim za kupovinu lijekova, namirnica i sl.

Općinska administracija je odmah reagirala i za četvrtak, 29.12.2016. godine sazvala sastanak sa svim političkim partijama, s ciljem da traži od predsjedavajuće OV, Nikoline Simić, da ponovo zakaže sjednicu OV, na kojoj će donijeti Odluku o privremenom finansiranju za mjesec januar i na taj način, odblokirati rad Općine na početku 2017.godine. Kako se predsjedavajuća nije odazvala sastanku, sjednicu je, za petak, 30.12. 2016.godine, zakazala jedna trećina vijećnika kako to Poslovnik OV u ovakvim situacijama predviđa.

Međutim, na istu se predstavnici koalicije nisu odazvali, pa zbog nedostatka kvoruma, 8 prisutnih vijećnika nije moglo održati sjednicu.

Napominjemo, da ovakva praksa u pravnom sistemu BiH nije zabilježena i da se prvi put dešava da je jedna općina, iako likvidna, doslovno dovedena u situaciju da ne može funkcionisati.

Takođe, ovo nije prvi put da novoformirana koalicija donosi odluke koje se protive zakonu, Poslovniku i statutu Općine. Naime, Općinski načelnik je uputio zahtjev za preispitivanje tri odluke koje su donesene na prvoj sjednici OV, a kojima je koalicija pregazila niz materijalnih propisa, uključujući Poslovnik OV i Statut Općine.

Iz naprijed navedenog, obavještavamo stanovnike općine Bosanski Petrovac, kao i poslovne partnere, da organ uprave, do usvajanja budžeta, nema zakonske mogućnosti da izvršava svoje finansijske obaveze, te je Bosanski Petrovac doveden u stanje potpune blokade, kako organa uprave, tako i samog grada.

U pravnoj praksi, općina Bosanski Petrovac će ostati zabilježena kao prva općina u kojoj je predstavnički organ, ne usvajajući Odluku o finansiranju, svojom voljom onemogućio rad i funkcionisanje iste.

Međutim, Općinski načelnik Zlatko Hujčić ističe, iako svjestan u kojem se stanju Općina našla, da neće iznevjeriti povjerenje građana koje mu je ukazano na nedavnim izborima i da će, unatoč opstrukcijama, nastaviti voditi ovu općinu pozitivnim putem, kako je to i do sada činio.

Nastavljamo dalje!

## Devet porodica imaju novi dom

# Uspješna realizacija još jednog projekta u Bosanskom Petrovcu

Uspješnoj realizaciji projekta priznanje je dalo devet porodica iz Bosanskog Petrovca kojima su 20. decembra uručeni ključevi novoizgrađenih, odnosno saniranih, stambenih jedinica.

Primopredaja ključeva korisnicima izgrađenih 9 stambenih jedinica izvršena je uz prisustvo predstavnika HWA, načelnika Opštine Zlatka Hujića, UNHCR-a, predstavnika opštinskog stručnog tima projekta, izvođača i nadzornog organa.

U kratkom obraćanju načelnik Hujić je istaknuo: „Sreća na licima članova ovih porodica je potvrda da smo uspješni. Nedovoljne su riječi da se opiše ovaj momenat. Ono što hoću naglasiti da će opština i u narednom periodu podržati svaki projekat koji će građanima omogućiti kvalitetan život u svim njegovim segmentima. Projekti koji se trenutno implementiraju imaju za cilj stambeno zbrinjavanje, izgradnju infrastrukture, razvoj poljoprivrede i samozapošljavanje.

Ja kao predstavnik svih građana, garantujem da ću se boriti za građane, za projekte i za investicije kojima će Bosanski Petrovac biti prepoznat kao sredina za primjer.

Korisnici projekta, Hajrić Mersada, Mujagić Alisa, Stevo Budimir, Rade Marjanović, Ahmet Ogrić, Hamdija Redžić, Radojka Romčević i Dušan Surla, ujedno su ekonomski osnaženi, gdje su prema željama i mogućnostima svakog pojedinog korisnika dobili pomoć u vidu plastenika, motokultivatora, freza, kosačica ili steonih junica.

Na licima korisnika, njihovih porodica mogla se vidjeti samo sreća i zadovoljstvo, koje su pokušali izraziti riječima.

„Ova kuća mi znači puno, danas sam jako sretna, zahvalila bih se načelniku, donatorima, izvođačima i svim ostalim koji su pomogli da mi se ova kuća izgradi“, riječi su Alise Mujagić.

„Kako nisam imao uslove da sam sebi napravim kuću, ovo mi puno znači, i želim da se zahvalim svima“, riječi su Dušana Surle.

„Moja porodica je zadovoljna, zahvaljujem se svima koji su učestvovali u ovom projektu“, kazala je Hajrić Mersada.

„Za mene ova kuća znači sve, sad moja porodica i ja imamo gdje živjeti, hraniti se, obavljati ličnu higijenu, jer u objektu u kojem smo živjeli nismo imali nikakve uslove za život“, rekla je Romčević Radojka.

Naime, zahvaljujući aktivnostima UNHCR koji je u periodu 2014 -2016. godine započeo provedbu projekta pod nazivom „Podrška trajnim rješenjima Revidirane strategije za provedbu Aneksa VII Dejtonskog mirovnog sporazuma“ u deset bosanskohercegovačkih opština među kojima je izabrana opština Bosanski Petrovac.

Glavni cilj projekta je obezbjeđivanje trajnih rješenja za najugroženije porodice raseljenih lica, manjinskih povratnika i žena - žrtava rata, i to kroz timski rad i saradnju lokalnih vlasti, mjesnih zajednica, civilnog društva i projektnih partnera.

UNHCR je implementaciju projekta u sektoru izgradnje i sanacije stambenih jedinica povjerio Hilsfwrek Austrija Internacional (HWA), partneru sa dugogodišnjim iskustvom u implementaciji sličnih aktivnosti.

HWA je, u saradnji sa opštinom Bosanski Petrovac, putem izgradnje i sanacije 9 stambenih jedinica sa pratećom infrastrukturom, podržao najugroženije porodice koje nisu imale minimum stambenih uslova, odnosno porodice koje su u potrebi za stambenim zbrinjavanjem pored čega je data i mogućnosti za samozapošljavanje i ostvarivanje prihoda, kroz dodjelu pojedinačnih grantova.



Porodica Redžić sa načelnikom, donatorima i izvođačima



Alisa Mujagić sa načelnikom, donatorima i izvođačima

## IFAD projekti

U okviru „Projekta razvoja ruralnog poslovanja“, načelnik Hujić, kao domaćin, sa svojim saradnicima Bajazidom Hadžalićem, Nevsadom Ramićem Mehić Muhamedom, i Draganom Manojlović, je dočekao stručni tim na čelu sa prof.dr. Halilom Omanovićem, te Erminom Kulovac, Smailom Toromanovićem i predstavnik agencije SEDRA Rifeta Džambegovića.

Od tri Opštine sa našeg Kantona koje su uključene u ovaj Projekat, delegacija je najprije posjetila našu Opštinu, a nakon toga uslijedila je posjeta i opštinama Bužim i Bosanska Krupa.

U Bosanskom Petrovcu se radi o sljedeća tri projekta:

1. Rekonstrukcija i izgradnja vodovodne mreže Bahići- Revenik
2. Rekonstrukcija i sanacija vodozahvata vodovodne mreže u MZ Vrtoče
3. Rekonstrukcija i asfaltiranje lokalnog puta Krnjeuša- Salati i sanacija asfaltnog puta Divna-Bjelaj

Vrijednost prvog projekta je 200.000 KM, drugog 95.500 KM, i trećeg 220.503 KM, s tim da će Opština učestvovati sa 30 % vlastitih sredstava.

U narednom periodu pristupit će se prikupljanju projektne dokumentacije, te hitnom ostvarivanju potrebnih tehničkih mjera za njihovu realizaciju.

Kroz tri godine očekuje se realizacija još projekata koji su vezani za razvoj ruralnog poslovanja.



Na prijemu kod načelnika

## Struja i u naselju Jakšić

Nakon apliciranja Opštine Bosanski Petrovac na Javni poziv za dostavu projektnih prijedloga u svrhu elektrificiranja stambenih jedincia povratnika i raseljenih lica od strane Ministarstva za ljudska prava i izbjeglice, predstavnici Ministarstva su 5. decembra izvršili terenski obilazak potencijalnog projektnog mikrolokaliteta.

Naime, riječ je o prioritetima mikrolokacije naselja Jakšić, Mjesne zajednice Kolunić, na kojoj se nalaze dva stambena objekta, Mirka Jakšića i Mare Lukač koji nemaju omogućeno priključenje na elektro-mrežu.

Cilj obilaska je evidentiranje stanja na terenu u odnosu na dostavljenu opštinsku aplikaciju.

Predstavnici Ministarstva, nakon obilaska terena i potencijalnih objekata su saglasni da je aplikacija Opštine u skladu sa svrhom Javnog poziva, te se nadamo pozitivnom ishodu, i da će se našim građanima omogućiti život dostojan svakom čovjeku, elektrifikacijom njihovih domova, čime bi im se omogućili osnovni životni uslovi.

### Lijepo vijesti...

## Sanacija svlačionica nogometnog stadiona „Mladost“

Dana 21. decembra, načelnik Zlatko Hujić je sa Federalnim ministarstvom kulture i sporta potpisao Ugovor vrijednosti 10.500 KM za sanaciju svlačionica nogometnog stadiona „Mladost“.

Ugovoreni iznos koji će biti dodjeljen od Ministarstva, dok će ostatak biti finansiran iz opštinskog budžeta.

„Imao sam tu privilegiju da potpišem ugovor sa Federalnim ministarstvom kulture i sporta, te da budem svjedok da se u našoj Opštini ostvaruje ono za šta se moji saradnici i ja borimo.

Ovakvih projekta bit će još više“, rekao je načelnik Hujić.

Realizacijom projekta će se steći osnovni uslovi, kako za našu djecu, tako i za djecu koja dolaze iz drugih opština i država na različite sportske manifestacije i takmičenja.

Najavljena sanacija svlačionica nije samo puko renoviranje neuslovnih prostorija, devastiranih i nehigijenskih podova, pločica, tuševa, i kupatila, već mnogo više od toga... To je početak napora u cilju očuvanja jedinog sportskog stadiona koji postoji u našoj Opštini i koji ima ulogu da okupi i animira mlade ljude, omogući im da se druže i takmiče, te razvijaju svoje tijelo i sportski duh.

## Otvaranje Kancelarije za saradnju sa dijasporom

Dana 21. decembra načelnik Zlatko Hujić je u Parlamentarnoj skupštini BiH u Sarajevu sa državnom ministricom za ljudska prava i izbjeglice Semihom Borovac, potpisao ugovor o dodjeli grant sredstava kojim se potiče saradnja sa dijasporom.

Naime, riječ je o otvaranju Kancelarije za saradnju sa dijasporom čija je vrijednost 11.000,00 KM.

Glavna aktivnost koja će se provoditi u Kancelariji je identifikacija visoko obrazovnog kadra, udruženja, organizacija, preduzeća iz dijaspore sa područja naše Opštine, koji djeluju i rade u inostranstvu, a sve to u koordinaciji sa Udruženjem Petrovčana u Beogradu i Novom Sadu.

Bitno je istaknuti da će se uspostaviti i servis Eletrkonske uprave i „Virtuelnog matičara“, kao i „Servis 48“, i drugih servisa koji će pojednostaviti administraciju na relaciji Opština- dijaspora.

Radit će se i na unapređenju promocije investitorskih potencijala Opštine, u vidu izrade promotivnog DVD-a, i organizovanja druženja „Veče Petrovčana“ uz promociju, u cilju očuvanja nacionalnog i kulturnog identitea, unapređenja privrednih, naučnih, kulturnih, informativnih, sportskih i drugih veza sa dijasporom, kao i podsticanje i usmjeravanje stručne i finansijske saradnje sa dijasporom.

Inače, ovaj projekat se implementira na osnovu Odluke Vijeća ministara BiH o dodjeli podrške opštinama, nevladinim organizacijama i udruženjima za implementaciju Strategije u oblasti migracija i azila 2016-2020 usvojene na 82. Sjednici Vijeća ministara održanoj 23. novembra.

U našem Kantonu, opština Ključ je, također, potpisala ugovor za razvoj plasteničke proizvodnje u saradnji sa migrantima.



# Predstavljena Platforma za izgradnju mira u sklopu projekta PRO- Budućnost

Dana 14.-15.12.2016.godine u Sarajevu uz prisustvo načelnika šezdeset opština iz Bosne i Hercegovine predstavljena je i uručena Platforma za izgradnju mira u sklopu projekta PRO-Budućnost.

Pored načelnika i gradonačelnika, ministrice za ljudska prava i izbjeglice BiH, ambasadorice SAD, te mnogih drugih projektnih partnera, ovoj svečanosti prisustvovao je i načelnik Opštine Bosanski Petrovac. „Platforma za mir je vodilja za mirnu i sigurnu budućnost ove zemlje i svih njenih naroda i građana“-rekao je načelnik Zlatko Hujčić.

Platforma za mir će tokom narednih mjeseci uz snažnu podršku Ministarstva za ljudska prava i izbjeglice BiH biti upućena Vijeću ministara BiH, a zatim i u Parlamentarnu skupštinu BiH. Načelnici šezdeset opština koji će potpisati Platformu postat će zagovarači, u tom za građane i narode BiH, neophodnom i ključnom procesu.



*Predstavljanje platforme mira u okviru PRO-Budućnosti*

## Direktor Sandi Terzić uručio Osnovnoj školi 18 novih tableta

U decembru je u prostorijama Osnovne škole "Ahmet Hromadžić" uručena vrijedna donacija od 18 novih tableta, od strane direktora Pirnara d.o.o. Sandija Terzića.

Naime, direktor Terzić je na ovaj način odlučio da pomogne školi i unaprijedi obrazovni proces za bosanskopetrovačke učenike.

Ova donacija omogućit će većini učenika da kroz interaktivne oblike nastave usvajaju nova znanja i prethodno stečena primjenjuju u praktičnom radu.

„Obrazovanje naše omladine je prioritet, jer školovan kadar doprinijet će da se opština Bosanski Petrovac što prije razvije i ide u korak sa evropskim standardima. Nadam se da će se uz pomoć doniranih tableta učenici uspjeti što bolje edukovati“, rekao je direktor Terzić.

Pored ove donacije, podsjećamo da je direktor Terzić imao sluha i za Radio Bosanski Petrovac, kada je donirao opremu u vrijednosti od 3.000 KM, a poznata je i činjenica da je donator manifestacije "Prvi maj" unazad dvije godine.

Opština Bosanski Petrovac i ovaj put pozdravlja ovakve geste, koje bi trebale da budu primjer ostalim privrednicima i svim našim uspješnim ljudima u svojim djelatnostima.



*Direktor Sandi Terzić uručio nove tablete*

## Nabavka akumulatora za solarne panele

U okviru Ugovora o realizaciji projekta infrastrukture u našoj Opštini, ministar Davor Čordaš, pružio pomoć u rješavanju problema za povratnička naselja srpskog stanovništva.

Naime, riječ je o donaciji čija je vrijednost 10.000 KM, a čija će se sredstva usmjeriti u nabavku akumulatora za solarne sisteme u svrhu elektrifikacije povratničkih domaćinstava u naselju Prkosi, MZ Vrtoče.

Podsjećamo da je Opština u saradnji sa UNDP 2014. godine uspješno postavila solarne panele na ovom prostoru, kada su stanovnici nakon 15 godina dobili struju.

Međutim, kako baterije više nisu snage kao prije, potrebna je zamjena i postavljanje novih.

## Izgradnja potpornog zida kod Crvenih jama

U području Crvenih jama, propadanje zaobilaznice i pojava klizišta, koje dugi vremenski period predstavljaju problem, kako stanovnicima koji žive u samoj blizini, tako i ostalim građanima koji su koristili ovu putnu relaciju, završeno je postavljanje potpornog zida.

Naime, potporni zid Crvenih jama je dužine oko 70 metara, a urađen je da bi se spriječili navedeni problemi.

Opština Bosanski Petrovac je za izgradnju izdvojila 20.000 KM, te ovim dokazuje činjenicu da se nastavlja uređenje, sanacija, te uspostavljanje okoliša dostojnog svakog građanina.



Sadašnji izgled zaobilaznice

## Načelnik Zlatko Hujčić preuzeo geodetsku opremu

Dana 21. decembra u prostorijama Federalne uprave za geodetske i imovinsko-pravne poslove načelnik Hujčić je prisustvovao preuzimanju geodetske opreme.

Naime, uspješno je okončana procedura javne nabavke geodetske opreme koja se putem zajedničkog finansiranja nabavila za potrebe jedanaest opštinskih službi, među kojima je i Opština Bosanski Petrovac, a koje su nadležne za geodetske poslove i katastar nekretnina.

Načelnik Hujčić je potpisao certifikat o primopredaji opreme, te je preuzeo geodetsku opremu za katastar naše Opštine.

Predmetna oprema je obezbijeđena iz sredstava Projekta registracije nekretnina, koji se finansira kreditnim sredstvima Svjetske banke. Federalna uprava za geodetske i imovinsko-pravne poslove i jedanaest opština učestvovali su u finansiranju nabavke opreme.

Zajednički cilj Federalne uprave i opštinskih službi jesu ažurni, tačni digitalni podaci, unificirani za cijelo područje Federacije BiH, koji su na jednostavan način dostupni građanima.

Pored naše Opštine, opremu su preuzeli i predstavnici opština: Čitluk, Hadžići, Kalesija, Jajce, Ključ, Uskoplje/ Gornji Vakuf, Kupres, Sanski Most, Ilijaš i Tešanj.



Načelnik Hujčić na preuzimanju geodetske opreme

# Održana radionica Općinskog razvojnog tima

## Tema: Sektorsko planiranje u procese revizije lokalne razvojne strategije

Početak decembra je završena radionica Općinskog razvojnog tima koja je počela krajem novembra, u maloj Sali naše Općine. Prisutni su se upoznali sa ostvarenim napretkom u prikupljanju revidiranih projektinih koncepata, a nakon toga uslijedilo je razmatranje do sada prikupljenih ideja za projekte i usklađivanje liste projekata sa raspoloživim finansijskim sredstvima, a sve u cilju formiranja strategije razvoja naše Općine.

Inače, Strategija razvoja općine Bosanski Petrovac je ključni strateško-planski dokument, u čijoj izradi učestvuju si

predstavnicima javnog, privatnog i nevladinog sektora, a koja obuhvata društvenu, ekonomsku, okolišnu kao i prostornu sferu.

Cilj izrade Strategije je definiranje zajedničkih ciljeva, podsticanje lokalnih snaga, ali i odgovor na izazove budućeg razvoja općine i sveukupnog života u njoj imajući u vidu da sve više domaćih i međunarodnih donatora kao jedan od uslova za apliciranje na potencijalne pozive zahtjevaju postojanje strateško-planskog dokumenta na nivou Općine.



Općinski razvojni tim na radionici

## Načelnik Zlatko Hujić učestvovao na drugom sastanku nezavisnih načelnika

### Tema: Rad jedinica lokalne samouprave

Načelnici općina Stari Grad Sarajevo, Bužim, Kalesija, Visoko i Bosanski Petrovac te gradonačelnici Zenice i Goražda su u periodu od 9. do 10. novembra, u Konjicu održali sastanak na temu rada lokalne uprave, sa posebnim akcentom na oblasti urbanizma, imovinsko-pravnih odnosa, privrede i finansija, opće uprave, lokalnog razvoja i rada sa NVO sektorom, te odnosa s javnošću.

Predstavnicima općina i gradova su razgovarali o dosadašnjim iskustvima svojih administrativnih jedinica, a najavljeni su i posebni sastanci. Sastanku su prisustvovali i eksperti iz raznih oblasti koji su zajedno s načelnicima i gradonačelnicima napravili jasne modele međusobne saradnje, ali i poduzimanje jasnih stavova za poboljšanje standarda građana.

Ovaj skup organizovan je sa ciljem razmjene iskustava uposlenika jedinica lokalne uprave, iznošenja prijedloga, primjedbi i sugestija, te konkretnih primjera u cilju poboljšanja poslovnih procesa unutar jedinica lokalne uprave.

Inače, održana su i tri okrugla stola na temu Lokalna i opća uprava, privreda i finansije; Lokalni razvoj; NVO i odnosi s javnošću, te Urbanizam i imovinsko-pravni odnosi.

Na ovom sastanku iz naše Opštine su, pored načelnika Hujića, prisustvovali i Adisa Eminoglu, Stručni savjetnik za stambeno-komunalnu djelatnost, Alma Mehmedbegović-Kartal, Stručni savjetnik za javne nabavke i Ena Širbić, Stručni savjetnik za obrt i poduzetništvo.

# Održan radni sastanak načelnika opština USK-a

Na zahtjev Predsjedništva Skupštine Saveza opština i gradova FBiH, u Bihaću je 13. decembra održan radni sastanak gradonačelnika i načelnika opština sa područja Unsko-sanskog kantona.

Na sastanku su jednoglasno usvojeni prijedlozi kandidata ispred osam lokalnih zajednica USK-a kada su u pitanju izbori čelnih ljudi Skupštine Saveza opština i gradova FBiH, Nadzornog odbora, te raznih komisija koje djeluju u okviru Saveza.

Naime, načelnik Zlatko Hujčić izabran je kao član Komisije za ustavna i zakonodavna pitanja ispred opština USK-a. Rad ove Komisije je posebno važan za našu Opštinu, jer će se u okviru nje raspravljati o zakonskim rješenjima predviđenim u Zakonu o šumama FBiH koji je u proceduri.

Kako su istakli čelni ljudi svih osam lokalnih jedinica, s obzirom da dugi niz godina niko iz Unsko-sanskog kantona nije bio izabran u rukovodstvo Skupštine Saveza, očekivanja su da će prilikom izbora USK-a, kao kandidat za člana predsjedništva Skupštine biti Nermin Ogršević, načelnik opštine Cazin.

## U našoj Opštini održana Skupština Udruženja pravobranilaca FBiH

U Domu kulture u 9. decembra je završena II redovna sjednica Skupštine Udruženja pravobranilaca u Federaciji Bosne i Hercegovine ( **UPUFBiH** ) započeta dan prije.

Domaćin ove sjednice, te organizator iste, bilo je **Općinsko pravobranilaštvo Bosanski Petrovac**, koje je kao poseban državni organ čija je osnovna uloga zastupanje jedinice lokalne samouprave pred nadležnim organima , te zaštita imovine i imovinskih interesa iste , osnovano tek 2015.g. .

U uvodnom dijelu zasjedanja prisutnim članovima dobrodošlicu i uspješan rad zaželio je općinski načelnik **Zlatko Hujčić** koji nije krio zadovoljstvo zbog činjenice održavanja ove sjednice upravo u našoj općini. U svom obraćanju naglasio je značaj i ulogu pravobranilaštva u radu i djelovanju svih nivoa vlasti,

a kao znak pažnje prisutnim članovima poklonio je knjigu „Bosanskopetrovački velikani kulture“ autora Senudina Jašarevića , koja je posvećena najvećim velikanima iz oblasti književnosti i umjetnosti koji su porijeklom upravo iz Bosanskog Petrovca.

U radnom dijelu sjednice doneseno je nekoliko važnih zaključaka među kojima su Zaključak o usvajanju Izvještaja o radu Udruženja za period maj/decembar 2016. g., te Zaključak o usvajanju Izvještaja o finansijskom poslovanju Udruženja za naprijed navedeni period , a konstruktivna diskusija otvorena je na temu statusa i uloge pravobranilaca u krivičnim postupcima u kojima postoji osnovana sumnja da su oštećeni budžeti općine, kantona ili Federacije BiH.

*(nastavak na slijedećoj stranici)*



Zajednička slika pravobranilaca FBiH

(nastavak sa prethodne stranice)

Pored navedenog jednoglasno je donesena Odluka o priznanju statusa pridruženih članova Udruženja za šest novih lica koja vrše dužnost pomoćnika pravobranilaca pri Pravobranilaštvu BiH, a koja su iskazala želju za daljnjim aktivnim učestvovanjem u radu ovog Udruženja. Tako je status pridruženih članova priznat **Safji Kreštalici, Zdravku Skočibašiću, Magdaleni Papić, Nađi Hozić, Jelisaveti Plasto i Fahreti Delić.**

Nakon radnog dijela skupštinskog zasjedanja, domaćin Skupštine općinski pravobranilac Almaida Suljić upriličila je zajedničku posjetu "Spomen-biblioteci Skendera Kulenovića" u kojoj se i danas nalaze izvornici nekih od najpriznatijih djela ovog velikana bosanskohercegovačke književnosti, priznanja koja je za života stekao, osobni predmeti koje je za života koristio, ali i djela slikara Mersada Berbera koja su ovoj ustanovi poklonjena.

Članovi Udruženja posjetili su i "Muzej Jovana Bijelića" u kojem se nalazi zbirka umjetničkih slika i ličnih predmeta akademskog slikara Jovana Bijelića, porijeklom iz Bosanskog Petrovca, koje je Komisija za očuvanje nacionalnih spomenika BiH tokom 2009.godine proglasila nacionalnim spomenikom Bosne i Hercegovine.

*„Tačno je da je Općinsko pravobranilaštvo Bosanski Petrovac po prvi put domaćin skupštinskog zasjedanja UPUFBiH, što me zbog činjenice nedavnog osnivanja ovog državnog organa posebno raduje. Kako svako zasjedanje, pored znanja iz oblasti našeg rada i djelovanja, obogatimo i novim znanjima o znamenitostima*

*grada domaćina, takva praksa ni ovaj put nije izostala. Održana sjednica imala je i karakter izborne, budući da smo na mandatni period od dvije godine izabrali novog predsjednika udruženja, pa ovom prilikom kolegici Enisi Hrelja zahvaljujem na dosadašnjem angažmanu u našem Udruženju, a kolegi Zlatku Osmanoviću čestitam na imenovanju te mu želim uspješan rad u predstojećem mandatnom periodu.*

*Naglasila bih da smo zajednički konstatovali potrebu za aktivnijim radom i djelovanjem Udruženja u kontekstu izjednačavanja pravnog i materijalnog statusa svih pravobranilaca, neovisno o tome da li ovu funkciju vrše na nivou entiteta, kantona ili općina, a čiji status se u ovom momentu uveliko razlikuje od općine do općine, te od kantona do kantona, i koji nije usaglašen sa statusom kolega pravobranilaca koji ovu funkciju vrše na nivu Federacije. U usporedbi sa statusom drugih nosilaca pravosudnih funkcija, a pri tome mislim na status sudija ili tužilaca, materijalno-pravni položaj pravobranilaca je krajnje neprihvatljiv kako zbog načina i perioda imenovanja, tako i zbog odnosa naspram drugih organa, te odgovornosti u obavljanju povjerene im dužnosti, zbog čega smatramo da je nužno što prije poduzeti sve raspoložive radnje u cilju jačanja i unapređenja uloge pravobranilaštva u društvu“ - kazala je **Almaida Suljić, općinski pravobranilac grada domaćina.***

## Načelnik u posjeti pogonu Alma Ras u Bosanskom Petrovcu

U cilju podrške, načelnik Zlatko Hujić je 26. decembra posjetio proizvodni pogon kompanije Alma Ras, koji je nedavno počeo sa radom i u našoj Opštini.

Tradiciju izvrsnosti u proizvodnji tekstila koju je imao Novitet nastavlja firma Alma Ras, koja je renomirani proizvođač i izvoznik visokokvalitetnih tekstilnih proizvoda.

### Najava novih radnih mjesta

Posjetu pogonu, načelnik Hujić je iskoristio za razgovor sa šeficom radne grupe koja je najavila da će Alma Ras u narednom periodu svake sedmice na obuku, potom u radni odnos, primati nove radnice.

Također, istakla je i da je zadovoljna sa radom novih uposlenika iz naše Opštine.

Inače, sadašnje uposlenice prošle su kroz obuku koja je organizovana u Visokom, te su stekle kompetencije da vode i koordiniraju poslove u Bosanskom Petrovcu, te su obučene za proizvodnju artikala brenda Alma Ras i osposobljene da stečeno znanje prenesu dalje.

Na kraju, sve ovo je pokazatelj da na bosanskopetrovačkom tlu dolazi do ekonomskog razvoja i boljeg života.



Tokom posjete načelnika Hujića

**Slušajte Radio Bosanski Petrovac od 15:00-17:00, svakim danom na 90.9 MHz fm**

# Međuvjerska tribina o pomirenju

## Poruka sa tribine: „Svi smo kao jedno“

U opštinskoj Vijećnici 7. decembra je održana javna tribina „Moj doprinos trajnom miru“, organizovane u okviru USAID-og projekta PRO-Budućnost, koji provodi CRS u saradnji sa Međureligijskim vijećem BiH, Fondacijom Mozaik, Caritasom BiH, Forumom građana Tuzle i Helsinškim parlamentom građana Banja Luka.

Na tribini su učestvovali predstavnici crkava i vjerskih zajednica, lokalnih vlasti, organa lokalne uprave, civilnog društva, obrazovnih institucija na čelu sa direktoricama osnovne i srednje škole, i ostali zainteresovani predstavnici bosanskopetrovačkog građanstva.

Uvodničari na javnoj tribini bili su: arhimandrit Searfim (Kužić), iguman manastira Rmanj, imam Mirzet ef. Spahić, te župnik iz Drvara vlč. Davor Klečina.

Javna tribina je osmišljena u formi panel diskusije na kojoj su predstavnici vjerskih zajednica i drugi učesnici dali svoj osvrt na važnost izgradnje trajnog mira iz religijske perspektive, a sa ciljem uključenja svih društvenih faktora u procesu vraćanja povjerenja među građanima BiH, bez obzira na njihovu nacionalnu ili vjersku pripadnost.

U okviru diskusije glavni imam, Mirzet Spahić je istakao: „Islam kao i druge božanske religije poziva na mir, i bitno je da u današnjem teškom vremenu, te teškoće i prepreke prevaziđemo zajedno“.

Na te riječi se, u duhu pravoslavlja nadovezao iguman manastira Rmanj: „Gradeći mir u svojoj duši, gradimo mir za sve nas. Na ovoj zemaljskoj kugli ima mjesta za sve“.

Svoj osvrt dao je i Davor Klečina, župnik iz Drvara: „Katolička crkva je dala svoj doprinos u izgradnji mira i pomirenja u Bosni i Hercegovini, to je i suština religije“.

Nakon izlaganja, uslijedila je živa diskusija, gdje su se za riječ javljali učenici osnovne škole, direktorica OŠ „Ahmet Hromadžić“, nastavnici i profesori vjeronauke, te ispred lokalne vlasti, vijećnik Marinko Mrđa.

Na kraju, upućena je jedna lijepa poruka iz Bosanskog Petrovca, koja se ne temelji samo na riječima, već na svakodnevnim djelima i primjerima iz života- „Svi smo kao jedno“.



Uvodničari na tribini



Učesnici tribine

# Održana Zimska škola uzgoja i upotrebe soje u našoj Opštini

Poljoprivredni zavod Unsko-sanskog kantona u saradnji sa German Corporation- GIZ i USAID/SIDA Projekat „Farma II“, a u sklopu Projekta „Danube Soya“, 14. decembra je u našoj Opštini organizovala Zimsku školu uzgoja i upotrebe soje.

Na samom početku obratio se domaćin Opštine, načelnik Zlatko Hujić, zaželivši uspješan rad prisutnima i izlagačima, te je istakao da Opština daje svesrdnu podršku daljem razvoju aktivnosti.

U formi izlagača govorili su Radomir Prodanović, koji je prisutnima govorio o agrotehnikama uzgoja soje, Edham Hodžić je govorio o pedološkim aspektima i isustvima o uzgoju soje na području USK-a i Midhat Glavić koji je predstavio ulogu i značaj soje u ishrani muznih i tovnih grla.

Kada je riječ o soji, u maju su počele aktivnosti na uzgoju na prostoru naše Opštine, gdje su četiri poljoprivredna proizvođača (Radošević Goran, Atlagić Zora, Kecman Ljiljana i Zulić Omer) zasijali soju na oglednim parcelama, ukupne površine 10 duluma.

Poljoprivrednim proizvođačima je bilo obezbjeđeno sjeme, zaštitna sredstva, te konsultantska pomoć od strane stručnjaka u ovoj oblasti.

Cilj jučerašnjeg skupa je da se utvrde i analiziraju rezultati na osnovu posmatranja razvoja kulture od sjetve do žetve, od strane Poljoprivrednog zavoda USK-a.

Naime, na osnovu ostvarenih rezultata, razmatranjem izvještaja oglednih parcela, utvrđeno je da naša Opština ima perspektivu i na ovom polju.

Sljedeće godine se očekuje nastavak aktivnosti, a o konkretnim detaljima znat će se tek na proljeće.



*Učesnici obuke koja se održala u našoj Opštini*

## Organizovan novogodišnji prijem

Načelnik Opštine Zlatko Hujić je 27. decembra u Domu kulture upriličio tradicionalni novogodišnji prijem za privrednike sa područja naše Opštine, direktore javnih preduzeća i ustanova, vijećnike, saradnike, predsjednike mjesnih zajednica i uposlene organa uprave.

Tom prilikom se zahvalio prisutnima na dolasku, a potom predstavio realizovane projekte, ulaganja u infrastrukturu, poljoprivredu, rad postojećih i dolazak novih investitora, kao i neke od planova u narednim godinama. Godine su ovo, koje

u odnosu na prijašnje oslikavaju bolji život, ali i motivaciju da se nastavi dalje, istakao je načelnik Hujić.

Kao jedan od uspješno realizovanih projekata, načelnik je istakao i dobijanje dozvole za letište Medeno Polje, te se obratio i general vazduhoplovstva iz Bihaća, Hasan Imamović. Tom prilikom načelniku je uručena medalja u znak uvažavanja i zahvalnosti.

Nakon obraćanja, prigodne čestitke povodom novogodišnjih praznika, uslijedilo je druženje.



*Obraćanje načelnika Hujića na novogodišnjem prijemu*

## Podjela novogodišnjih paketića

Uz osmijeh na licu i neizmjernu radost, djeca su sinoć u Domu kulture dočekala Djeda Mraza, koji je u duhu novogodišnje radosti, pohvalio svu djecu, te nakon igre, izvršio podjelu paketića.

Naime, podjelu paketića organizovao je JU Centar za kulturu i obrazovanje, Bosanski Petrovac, Opština Bosanski Petrovac, u saradnji sa ostalim sindikalnim organizacijama.

Sindikalane organizacije već dugi niz godina organizuju podjelu paketića, a cilj manifestacije jeste zblizavanje

djece, ali i roditelja. Ovo je i jedan od načina da se podijeli novogodišnja radost, gdje su djeca imala priliku da se zajedno igraju i sa klovnom, osvajaju nagrade i druže sa ostalom djecom iz naše Opštine.

Isto tako, podjela novogodišnjih paketića organizovana je i od strane Centra za socijalni rad „Bosanski Petrovac“, u saradnji sa Adrom čiji je predstavnik Let's do it, i bosanskopetrovačkom firmom Mell plast. Paketići su bili namijenjeni za djecu koja su na evidenciji Centra za socijalni rad.



Podjela paketića u okviru sindikalnih organizacija



Podjela paketića u okviru Centra za socijalni rad, prva grupa...



...druga grupa

# Učeniku generacije Muji Mašiću uručena novčana nagrada

U kabinetu načelnika Hujića, 29. decembra uručena je nagrada od 1.000,00 KM učeniku generacije Mješovite srednje škole „Bosanski Petrovac“, Muji Mašiću.

Prijemu su prisustvovali direktorica škole Besima Kišljen, kao i roditelj nagrađenog učenika.

Nagradu je, zbog odsustva načelnika, uručio sekretar organa uprave, Esmir Brković.

„Shodno Odluci Općinskog vijeća pripala mi je čast, da u ime načelnika Hujića uručim nagradu učeniku generacije“, rekao je Brković.

Učenik, Mujo Mašić, nakon završene srednje škole u Bosanskom Petrovcu, svoje školovanje je nastavio na Medicinskom fakultetu u Tuzli.

„Nagrada za učenika generacije meni znači mnogo, znači mi određeni podsticaj za dalje.

Upisao sam Medicinski fakultet u Tuzli, te nastojim da u što boljem svjetlu predstavim sebe i svoju Opštinu. Titula učenik generacije je pokazatelj da sam naučio učiti, te da sam imao kvalitetne profesore, čije preneseno znanje mi danas olakšava učenje na fakultetu“, rekao je učenik generacije.



Sekretar Opštine, Esmir Brković uručuje novčanu nagradu učeniku generacije Muji Mašiću

## Održan Prvi glas Bosanskog Petrovca

Tradicionalna manifestacija „Prvi glas Bosanskog Petrovca“, održana je 25. decembra, u prepunoj dvorani Mješovite srednje škole u Bosanskom Petrovcu.

Organizator manifestacije je bosanskopetrovački Centar za kulturu i obrazovanje, uz generalno sponzorstvo Opštine Bosanski Petrovac svoj doprinos su dali i naši domaći privrednici.

Pred brojnom publikom nastupilo je 13 izvođača, koje su i ove godine za nastup pripremali, vodili, vjerno pratili legendarni i svima dobro poznati „Ećo i Mešak“.

Svako na svoj način samim učešćem je izvojevao svoju pobjedu, a stručni žiri je ipak izdvojio tri takmičara koji su za nijansu bili uspješniji.

Naime, titulu „Prvog glasa 2016“ osvojila je Anela Ferizović koja je izvela pjesmu „Korake ti znam“, drugo mjesto osvojio je Nikola Stojanović koji je izveo pjesmu „Rado te se sjetim“, a treće mjesto Amir Mujanić, koji je izveo pjesmu „Oči moje kletvom bih vas kleo“.

U revijalnom dijelu nastupili su krajiška grupa „Runolist“ i mlada bosanskopetrovačka zvijezda, Medina Ganibegović.



Pobjednica Prvog glasa, Anela Ferizović

# Prvo općinsko druženje dobrovoljnih davalaca krvi

Prva sedmica decembra je bila obilježena humanim gestama Crvenog križa „Bosanski Petrovac“.

Pored prvog općinskog druženja koje je organizirano u sklopu projekta „Pruži mi ruku i daruj krv“, na kojem su prisustvovali brojni gosti, aktivni davaoci krvi naše Opštine, ali i predsjednik Crvenog križa Unsko-sanskog kantona, Husein Kličić, u subotu je u Domu zdravlja organizovana i treća akcija darivanja krvi ove godine.

„Ovo je treća akcija darivanja krvi ove godine. Mi je realizujemo u sklopu programa koji nam je odobren od Federalnog ministarstva rada i socijalne politike. Imamo oko 70 aktivnih, registrovanih davalaca u Križu. Da bi neko darovao krv prvo treba da bude punoljetan i da je dobrog zdravstvenog stanja. 1. decembra smo organizovali prvo općinsko druženje, gdje smo darivateljima sa područja naše Opštine podijelili priznanja, zahvalnice. Ovo je prvo

druženje- nadam se da će prerasti u tradicionalno.“, riječi su Sabine Nadarević, sekretara Crvenog križa.

Bitno je istaknuti i pozitivnu činjenicu da je tokom akcije u subotu učestvovalo mnogo mladih ljudi, učenika srednje škole, a razlog je nedavno održana edukativna radionica na temu „Dobrovoljno davalaštvo krvi“, gdje su mladi upoznati sa značajem darivanja.

„Samim sticanjem znanja i osvješćivanjem samog značaja ove humane geste, mladi su došli i priključili se „armiji“ davalaca krvi“, ističe sa zadovoljstvom Nadarević.

Sabina Nadarević dalje navodi da je saradnja opštinskog Crvenog križa sa Kantonalnim križom odlična, te da su 24. novembra, u Bihaću organizovali i zajedničko darivanje krvi, a sve u cilju mogućnosti i želje da pomognu onim ljudima kojima je to potrebno.






foto Hare

*Petrovački Velikani u snijegu...*

#### Važni brojevi u Općini Bosanski Petrovac

Policija	122
Hitna pomoć	124 ; 883-687
Vatrogasci	123
OPĆINA BOSANSKI PETROVAC	883-570

Slušajte Radio Bosanski  
Petrovac od 15:00-17:00,  
svakim danom na 90.9 MHz fm